



UNIVERSITÄTS-
BIBLIOTHEK
PADERBORN

Universitätsbibliothek Paderborn

Formularium Episcopale

Barbosa, Agostinho

Coloniae Agrippinae, 1680

28. Reductio Constitutionum à Pio V. pro Mendicantibus, & aliis Regularibus contra locorum Ordinarios, &c. editarum ad terminos juris, & Concilii Trident.

urn:nbn:de:hbz:466:1-10456

Reductio Constitutionum à Pio V.
pro Mendicantibus, & alijs Regulari-
bus contra locorum Ordinarios &c.
editarum ad terminos juris, &
Concilij Tridenti-
ni.

XXVIII.

GREGORIUS *Episcopus, servus
servorum Dei, ad perpetuam
rei memoriam.*

IN tanta rerum & negotiorum mole, qua Romanus Pontifex ex omnibus mundi partibus assidue premitur, vix vitari potest ne aliqua interdum exilient, quibus postea recognitis, necesse est moderationis remediū adhibere. Cum itaque alijs fel. rec. Pius Papa V. prædecessor noster auditis gravaminibus, quæ Fratribus Ordinum Mendicantium ab Ordinarijs locorum, & Parochialium Ecclesiarum Rectoribus, multis modis inferri dicebantur super sacris Concionibus & lectionibus habendis, Confessionibus audiendis, pœnitentijs injungendis, Fratres ad Ordines promovendis, celebratione Missarum, cura animarum, Sacramentorum administratione, sepulchris, quanta funeraliū, legatis, donationibus, eleemosynis, collectionib. alijsque ejusmodi juribus, necnon decimis, & diversis oneribus, ac etiam

super statu & regimine Sanctimonialium ipsis Fratribus subjectarum, formatione processuum, censurarum publicatione, processibus, præcedentia, locorum acquisitione, ceterisque alijs rebus tunc expressis, multa per quasdam suas literas, pro dictis Fratribus non modo statuerit, sed & quæ jam in Concilio Tridentino decreta fuerant ad hæc pertinentia, declaravit, multaque alia privilegia ejusdem XVII. Kal. Junij. Pontificatus sui anno secundo, & deinde ea omnia diversis alijs Ordinibus & Congregationibus Regularium non Mendicantium, etiam per modum communicationis concesserit. Postea per quandam suam constitutionem de Vicarijs perpetuis in Parochialibus Ecclesijs unitis per Ordinarios locorum instituendis, & portione illorum Vicarijs assignanda editam, alia super constitutione Fratrum eorundem ad exercitium curæ animarum in eis Parochialibus Ecclesijs, quæ domibus & locis suis unitæ sunt, decreverit. Demum animadverso, quod ea omnia multis dubitationibus involuta, magna quoque difficultatibus obstructa, multas magnasque dissensiones, altercationes, & lites inter prædictos locorum Ordinarios, & Fratrum ipsorum Ordines, non sine gravi divini cultus, & animarum detrimento, ac populorum scandalo concitaverant, contra ac ipse sperabat, ac præter suam expectationem, ut qui interdum conquæretur, multa aliter, alioque sensu à se
prolatam

prolata fuisse, quam litteris expressa essent: cupiens his mederi incommodis, primum illa omnia, quæ Regularibus aliorum Ordinum quàm Mendicantium, communicaverat, & secundum præmissa concesserat, Motu proprio restrinxerint: deindè plenius providere volens, prioribus litteris à se, quò ad ipsos Mendicantes, magna in parte moderatis, omnes quascunque alias litteras, quæ de alijs Ordinibus & Congregationibus extrà Mendicantium Ordines de observantia nuncupatos emanaverant, omninò aboleverit, causas omnes jam de his etiam in Romana Curia pendentes ad se advocando, lites extinguendo, ac formatos super illis processus, latalque sententias annullando, quemadmodum alijs suis litteris in Registro proximè compertis, nunquam tamen publicatis, plenius continetur. Postremo circa Confessoriorum Regularium etiam Mendicantium approbationem, juxtà Concilij prædicti decretum faciendam, etiam Lectores in Theologia graduatos; & certos alios tunc expressos comprehendere debere declaraverit: Nos hac tanta varietate cognita quæ etiam ex multiplici litterarum & constitutionū editione procedit, præsentibus & futuris discriminibus occurrere volentes, de nobis attributæ potestatis plenitudine statuimus & ordinamus, de prædictis & alijs omnibus litteris & constitutionibus, quæ ab eodem prædecessore eisdem de rebus, pro quorumcunque Regularium, etiam Mendicantium, Or-

dinibus & Congregationibus quomodolibet emanarunt, ac omnibus & quibuscunque in eis contentis, eandè deinceps dispositionem, atque decisionem pro subjecta materia futuram esse, quæ sive ex jure veteri, sive ex sacris dicti Concilij decretis, sive alijs legitimè ante dictarum & constitutionum editionem erant, ac si ipsæ non emanassent futura fuisset, ad quam dispositionem & decisionem suumque pristinum & integrum statum, ac terminum illa omnia reducimus. Quin etiam tollimus & abrogamus omnia irritantia & alia decreta, nec non prohibitiones, declarationes, mandata, & quæcunque alia ipsi litteris, & constitutionibus apposita, & alijs eorum occasione, vel causa facta, his nostris statuto, ordinationi, & reductioni adversantia, quibuscunque illa sint concepta formulis, ac præservationibus, declarationibus, modificationibus, restitutionibus, mentis attestationibus, derogatorijs derogatorijs, alijsque fortissimis, efficacissimis, & inviolabilibus clausulis, etiam Motu, & potestatis plenitudine similibus, & ex certa scientia, etiam pro conservatione status Regularis, & ex quibuscunque alijs urgentissimis causis quotiescunque roborata: Decernentes illa omnia pro nullis, & infectis haberi, omnesque suprascriptos illorum usu, commodo, & effectu carere: ac omnes lites & controversias, quæ coram quibusvis iudicibus, sive

Bb 2

Ordi-

Ordinariis, sive Commissariis, etiam causarum Palatii Apostolici Auditoribus & S. R. E. Cardinalibus, etiam de Later. Legatis, prædictarum litterarum & constitutionum occasione super præmissis jam motæ sunt, necdum decisæ, aut finitæ, vel etiam quæ jam decisæ sunt, si modo tractum habeant successivum, easque rursus, & inter quoscunque excitari in posterum contingat, secundum prædictam dispositionem, nec aliter decidendas: futura verò dubia & difficultates, quodocunque & ubicunque orientur, ad nos & Sedem Apostolicam, ubi & cætera quæ ad decreta dicti Concilii pertinent, quotidie declarantur, omnino deferenda esse: necnon irritum & inane quidquid secus super his per quoscunque scienter vel ignoranter contigerit attemptari. Mandamus itaque in virtute sanctæ obedientiæ, præsentibus ab omnibus ubique Episcopis, & locorum Ordinariis, necnon Ecclesiarum Prælati, Rectoribus, Fratribusque prædictis, ac cæteris, ad quos pertinet, semper inviolatas observari. Non obstantibus præmissis, ac constitutionibus, & ordinationibus Apostolicis, necnon Ecclesiarum, Monasteriorum, Conventuum, locorum domorum, & Ordinum quorumcunque statutis, & consuetudinibus, privilegiis quoque, indultis, & litteris Apostolicis, etiam Mare magnum, & Bulla aurea nuncupatis, dictis Ecclesiis, Ordinibus, & Congregationibus quomodolibet concessis & con-

& confirmatis, quibus omnibus &c. illis alias in suo robore permanentibus, hæc vice duntaxat specialiter, & expressè derogamus, cæterisque contrariis quibuscunque. Ut autem præsentibus omnibus plenius innotescant &c. Nulli ergo omnino hominum liceat hanc paginam nostræ Ordinationis, statuti, reductionis, abolitionis, abrogationis, decreti, mandati, derogationis, & voluntatis infringere, vel ei ausu temerario contraire. Si quis autem &c. Datum Romæ apud S. Petrum, anno Incarnationis Dominicæ M.D.LXXII. Kalend. Martii Pontificatus nostri anno primo

M. Datarius
Cæs. Glorierius.

Super executione litterarum Apostolicarum: & declaratione Concilii Trid. sess. 24. c. 20. de reform.

XXIX.

Part. 3. alleg. 81.

GREGORIUS Episcopus, servum servorum Dei, ad perpetuam rei memoriam.

AD Romani Pontificis providentiâ circumspectam pertinere dignoscitur, dubia super Sacrorum Conciliorum decretis pro tempore insurgentia, sic sua declarationis oraculo dilucidare & interpretari, ut exinde litium dispendia